



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 14. stav (1) Zakona o finansiranju političkih stranaka („Službeni glasnik BiH“ broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka („Službeni glasnik BiH“ broj 61/06) a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2009. GODINU HRVATSKE STRANKE PRAVA BOSNE I HERCEGOVINE

Broj: 03-07-6-91/10
Sarajevo, 18.03.2011. godine

SADRŽAJ:

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS REVIZIJE.....	5
Predmet revizije.....	5
Cilj revizije	5
Obim revizije	5
4. PRETHODNE KONTROLE I REVIZIJE.....	5
5. NALAZI REVIZIJE I PREPORUKE	5
5.1. NALAZI.....	5
5.2. PREPORUKE	8

MIŠLJENJE REVIZORA

Služba za reviziju finansiranja političkih stranaka izvršila je reviziju godišnjeg finansijskog izvještaja Hrvatska stranke prava Bosne i Hercegovine za 2009. godinu.

Rukovodstvo stranke je odgovorno za finansijske izvještaje, postupanje u skladu sa zakonima i propisima i uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garancije da je stranka postupala u skladu sa Zakonom o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

Utvdili smo da Hrvatska stranka prava Bosne i Hercegovine u izvještajnom periodu nije postupala u skladu sa odredbama člana 4. stav (2), člana 8. Stav (1) i člana 11. stav (1) i stav (3) Zakona o finansiranju političkih stranaka.

Prema našem mišljenju, osim navedenog, revidirani finansijski izvještaj ukazuje da je Hrvatska stranka prava Bosne i Hercegovine u 2009. godini postupala u skladu sa odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila reviziju godišnjeg finansijskog izvještaja Hrvatske stranke prava Bosne i Hercegovine za 2009. godinu.

Revizija je preduzeta u skladu sa članom 14. stav 1. Zakona o finansiranju političkih stranaka i članom 24. Pravilnika o godišnjim finansijskim izvještajima političkih stranaka („Službeni glasnik BiH“ broj 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08).

Zbog činjenice da se revizija obavlja na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Hrvatska stranka prava BiH je ostvarila prihode u iznosu od 249.634,87 KM, čija struktura je data u sljedećoj tabeli:

Red. br.	Vrsta prihoda	Iznos u KM	Učešće u uk.prih. %
1	Članarina	430,00	0,17%
2	Prilozi fizičkih lica	0,00	
3	Prilozi pravnih lica	0,00	
4	Prihodi od imovine	17,41	0,01%
5	Prihodi od pr.lica	0,00	
6	Prihodi od poklona	0,00	
7	Prihodi iz budžeta	249.187,46	99,82%
	Ukupni prihodi:	249.634,87	100,00%

U godišnjem finansijskom izvještaju Hrvatska stranka prava BiH je iskazala ukupne rashode u iznosu od 140.038,50 KM.

2. PREDSTAVLJANJE POLITIČKE STRANKE

Naziv političke stranke: Hrvatska stranka prava Bosne i Hercegovine. Stranka je nosila naziv Hrvatska stranka prava Bosne i Hercegovine „Đapić – dr. Jurišić“ koji je Rješenjem broj R/2-10 od 18.03.2010. godine kod Općinskog suda Mostar promjenjen u Hrvatsku stranku prava Bosne i Hercegovine. Skraćeni naziv stranke je HSP BiH. Hrvatska stranka prava BiH je registrovana 23.01.2008. godine kod Općinskog suda u Mostaru pod brojem R/6-07. Sjedište političke stranke je u Mostaru, Kneza M.V. Humskog 39.

Lica ovlaštena za zastupanje stranke su Zvonko Jurišić, predsjednik stranke i Žarko Pavlović, zamjenik predsjednika stranke.

Lice ovlašteno za podnošenje finansijskih izvještaja za 2009. godinu je Krasnodar Vasić.

Prema podacima iz godišnjeg finansijskog izvještaja za 2009. godinu, Hrvatska stranka prava BiH ima sljedeće organizacione odbore:

- 5 Kantonalnih vijeća,
- Gradsku podružnicu Mostar i
- 25 općinskih podružnica.

3. OPIS REVIZIJE

Predmet revizije je godišnji finansijski izvještaj Hrvatske stranke prava BiH za 2009. godinu i to:

- Centrala HSP BiH,
- Gradski odbor Mostar i
- Općinski odbor Ljubuški.

Cilj revizije je da se prikupi dovoljno relevantnih dokaza kako bi se moglo izraziti mišljenje o tome da li je Hrvatska stranka prava BiH u izvještajnom periodu postupala u skladu sa odredbama Zakona o finansiranju političkih stranaka

Obim revizije finansijskog izvještaja Hrvatske stranke prava BiH obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta.

4. PRETHODNE KONTROLE I REVIZIJE

Služba za reviziju izvršila je reviziju godišnjeg finansijskog izvještaja za 2006. godinu i pregled godišnjih finansijskih izvještaja za 2007. i 2008. godinu nakon čega je izdala izvještaj o reviziji i izvještaje o pregledu sa mišljenjem revizora, nalazima i preporukama revizije da stranka treba da postupa u skladu sa odredbama člana 8. stav (1) i člana 11. stav (1) i (3) Zakona o finansiranju političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2009. godinu, utvrđeno je da politička stranka nije ispoštovala preporuke koje su date u izvještajima o pregledu godišnjih finansijskih izvještaja za 2006., 2007. i 2008. godinu, odnosno stranka i dalje krši odredbe člana 8. stav (1) i člana 11. stav (1) i (3) Zakona o finansiranju političkih stranaka.

5. NALAZI REVIZIJE I PREPORUKE

5.1. NALAZI

a) Hrvatska stranka prava BiH je prekršila odredbe člana 4. stav (2) Zakona o finansiranju političkih stranaka.¹

Uvidom u dokumentaciju političke stranke, vezanu za nabavku opreme i usluge reprezentacije, utvrđeno je da stranka ne raspolaže računima ispostavljenim od strane svih pravnih lica od kojih je izvršena nabavka.

- Stranka je u ugostiteljskoj firmi "Finvest Bastasica" doo Drvar izvršila konzumaciju hrane i pića i istu platila iznosu od 286,50 KM. Za ovu vrstu usluge stranka je dobila nepotpun račun, odnosno primila je račun koji ne sadrži sve potrebne elemente računa. Na računu opisno stoji da je izvršena konzumacija hrane i pića u Hotelu "Bastasica" bez preciziranja količine i cijene. U prilogu ovog računa stranka je trebala imati račun iz registar kase na kojem su precizirane stavke o vrsti konzumirane hrane i pića sa količinama i cijenom iste. Obzirom da stranka ne raspolaže

¹ Prema odredbama člana 4. stav (2) Zakona o finansiranju političkih stranaka, pravno ili fizičko lice koje političkoj stranci pruži uslugu ili proda proizvod mora stranci da ispostavi račun, bez obzira na to ko snosi plaćenje, odnosno, bez obzirana to da li je usluga pružena ili proizvod dat bez naplate.

adekvatnim računom postupila je suprotno odredbama člana 4. stav (2) Zakona o finansiranju političkih stranaka.

- Takođe, stranka je za određenu vrstu reprezentacije iz blagajne isplatila sredstva u iznosu od 2.700,00 KM. Uvidom u dokumentaciju utvrđeno je da uz isplatnicu iz blagajne stranka nema priložen račun, koji joj je trebao biti ispostavljen kako je propisano članom 4. stav (2) Zakona.
- Stranka je izvršila nabavku 12 stolica i iste platila u iznosu od 714,00 KM. Nabavka stolica je izvršena od firme „Mebl Star“ doo Vitez, za što je firma ispostavila dokument sa podacima za dostavu kupljene robe, a za nabavku stolica stranci nije ispostavila račun u skladu sa odredbama člana 4. stav (2) Zakona o finansiranju političkih stranaka.

b) Revizijom godišnjeg finansijskog izvještaja utvrđeno je da je Hrvatska stranka prava BiH prekršila odredbe člana 8. stav (1) Zakona o finansiranju političkih stranaka.²

Stranka je za svoj rad u 2009. godini, bez naknade koristila poslovne prostorije u vlasništvu Grada Mostara.

Rješenjem broj: 07/II-1-2042/99 od 10.11.1999. godine Općina Mostar -Jugozapad je ovoj političkoj stranci dodijelila na korištenje poslovni prostor površine 184 m² u Ulici Kneza Mihajla Viševića Humskog broj 39 u Mostaru. Na osnovu Odluke o dodjeli u zakup, korištenju i održavanju poslovnih prostora u vlasništvu Općine Mostar - Zapad („Službeno glasilo Gradske općine Mostar-Zapad“, broj 9/01), kojom cijena poslovnog prostora na području Mostara za neprofitabilne i humanitarne organizacije iznosi 10 KM/m². Na osnovu navedene Odluke utvrđeno je da mjesečna zakupnina poslovnog prostora koji koristi Hrvatska stranka prava BiH iznosi 1.840,00 KM mjesečno, odnosno 22.080,00 KM godišnje. Obzirom da stranka nije plaćala zakup navedenog poslovnog prostora ostvarila je prilog u iznosu od 22.080,00 KM, koji je zabranjen Zakonom o finansiranju političkih stranaka.

Pored navedenog, poslovne prostore bez naknade, vlasništva općinskih organa, su koristile sljedeće općinske podružnice Hrvatske stranke prava BiH: Čapljina, Posušje, Grude i Široki Brijeg.³

c) Stranka je prekršila odredbe člana 11. stav (1) i (3) Zakona o finansiranju političkih stranaka.⁴

- Finansijski izvještaj nije popunjen u skladu sa Pravilnikom o godišnjim finansijskim izvještajima političkih stranaka („Službeni glasnik BiH“ broj 61/06).

Uvidom u finansijsku dokumentaciju političke stranke vezanu za promet blagajne, na obrascu 2-1 finansijskog izvještaja (Pregled stanja blagajne) utvrđeno je da uplate novčanih sredstava na blagajnu i isplate sredstava iz blagajne nisu evidentirane u momentu kada su i izvršene.

U 2009. godini sa transakcijskog računa stranke obavljene su 23 transakcije podizanja sredstava za potrebe plaćanja materijalnih troškova iz blagajne. Navedena sredstva stranka je evidentirala u blagajnu kroz jednu uplatnicu u iznosu od 44.100,00 KM dana 31.12.2009. godine, dok je isplate iz blagajne evidentirala u blagajni isplatnicama prateći njihovu vremensku dinamiku. U poslovnim knjigama stranka je na analitičkoj kartici prometa blagajne sve isplate u toku 2009. godine

² Državni, entitetski i kantonalni organi, organi opštinskih i mjesnih zajednica, javne institucije, javna preduzeća, humanitarne organizacije, preduzeća koja su po svojoj djelatnosti isključivo neprofitna, vjerske zajednice, kao i privredna udruženja u kojima uloženi javni kapital iznosi najmanje 25% ne mogu da finansiraju političke stranke.

³ Izjava broj TS-421/11/10 od 12.11.2010. godine.

⁴ U skladu sa članom 11. stav (1) Zakona o finansiranju političkih stranaka političke stranke su obavezne voditi evidenciju o svojim prihodima i rashodima.

U skladu sa članom 11. stav (3) Zakona politička stranka je obavezna da Centralnoj izbornoj komisiji Bosne i Hercegovine podnosi finansijske izvještaje na obrascima koje je odobrila CIK BiH, a čiji su sadržaj i forma propisani Pravilnikom o godišnjim finansijskim izvještajima političkih stranaka.

evidentirala u jednom iznosu od 34.316,84 KM, a ulaz u blagajnu je evidentirala takođe u jednom iznosu od 44.100,00 KM. Takođe, stranka je u okviru blagajne otvorila podanalitički račun gdje je evidentirala samo uplate u blagajnu, odnosno 23 transakcije kojima je novac podignut sa transakcijskog računa, u 2009. godini. Takođe, utvrđeno da stranka blagajnu vodi na godišnjem nivou, odnosno da u toku godine ne pravi pregled stanja blagajne. Ovakav način vođenja evidencija nije u skladu sa računovodstvenim propisima i odredbama člana 11. stav (1) Zakona o finansiranju političkih stranaka.

Stranka je u okviru Ukupnih prihoda političke stranke iskazala prihode iz budžeta u manjem iznosu od stvarnog za 6.360,00KM. U Obrascu 3-f finansijskog izvještaja (Prihodi iz budžeta) stranka je iskazala prihod koji je primila iz budžeta Općine Čitluk u iznosu od 4.240,00 KM.

Uvidom u akt Općine Čitluk⁵ utvrđeno je da je ovoj političkoj stranci iz budžeta navedene općine uplaćeno 10.600,00 KM. Od toga je 4.240,00 KM uplaćeno na račun stranke, a 6.360,00 KM Općina Čitluk je po zahtjevu predsjednika Kluba vijećnika HSP BiH stranke uplatila na račun broj 3381202101041061 otvoren u UniCredit banci u Čitluku. Neiskazivanjem primljenih sredstava u finansijskom izvještaju stranka je postupila suprotno odredbama člana 19. stav (1) Pravilnika o godišnjim finansijskim izvještajima političkih stranaka.⁶

Stranka je godišnji finansijski izvještaj za 2009. godinu popunila i dostavila na nivou stranke, odnosno troškove na obrascima 4-1 (Režijsko-administrativni i ostali troškovi) je dostavila zbirno na nivou stranke i nije ih popunila i dostavila po organizacionoj strukturi. Uvidom u poslovne knjige stranke utvrđeno je da stranka i u poslovnim knjigama troškove ne evidentira po mjestu nastanka troška.

Stranka ne iskazuje stvarne troškove i obaveze. Uvidom u dokumentaciju utvrđeno je da je stranka u 2009. godini na troškovima električne energije evidentirala pet faktura za utošenu električnu energiju iz 2008. godine u iznosu od 194,54 KM, nakon što je primila Opomenu pred obustavu isporuke električne energije JP Elektroprivrede HZHB dd Poslovnica Odžak.

Takođe, stranka je u 2009. godini na troškovima telefona evidentirala tri fakture za telefonske usluge iz 2008. godine u ukupnom iznosu od 183,92 KM, i to nakon što je primila Opomenu HT Mostar doo. Na isti način stranka je fakture iz 2008. godine evidentirala na troškove u 2009. godini i to: troškove reprezentacije u iznosu od 203,00 KM, na ostalim rashodima fakturu u iznosu od 315,00 KM i na ostalim uslugama fakturu u iznosu od 2.369,72 KM.⁷

Stranka zakupe poslovnih prostora ne evidentira na obavezama, tek kada plati zakupninu tada evidentira na troškove zakupnine. Na taj način stranka ne iskazuje obaveze u realnom iznosu, a troškove ne iskazuje u momentu kada su i nastali.

Takođe, na istom obrascu stranka je u okviru ostalih rashoda iskazala i sredstva koja je uplatila u korist Mjesne zajednice Srednja Omarska Usora u iznosu od 1.500,00 KM po zamolbi za sponzorstvo turnira. Za navedenu vrstu troška stranka je u skladu sa članom 11. stav (1) Zakona o finansiranju političkih stranaka i članom 21. Pravilnika o godišnjim finansijskim izvještajima bila obavezna izvršiti klasifikaciju nastalih troškova. Nepravilnom klasifikacijom troškova stranka je postupila suprotno odredbama člana 21. Pravilnika o godišnjim finansijskim izvještajima političkih stranaka.⁸

⁵ Akt Općine Čitluk broj 05-403-40/10 od 13.07.2010. godine.

⁶ U skladu sa članom 19. stav (1) Pravilnika u obrazac 3-f (Prihodi iz budžet) popunjava se na nivou političke stranke i u njemu se evidentiraju sva sredstva iz budžeta svih nivoa vlasti koja je politička stranka primila u izvještajnom periodu.

⁷ Company Perić faktura broj 2008/807 od 16.05.2008. godine, Hotel Ero doo faktura broj 533/2008 od 03.04.2008. godine i MediaMix doo Mostar faktura broj 12-10/08 od 17.10.2008. godine.

⁸ U skladu sa članom 21. Pravilnika o godišnjim finansijskim izvještajima političkih stranaka u obrazac 4-1 – Režijsko-administrativni i ostali troškovi, unose se svi troškovi osim troškova propagande, i sljedeći podaci: naziv organizacionog dijela političke stranke, vrsta troška, konto i iznos.

- Na osnovu navedenog utvrđeno je da stranka nije vodila adekvatne evidencije o svojim prihodima i rashodima, i da u godišnjem finansijskom izvještaju nije iskazala sve prihode koje je ostvarila u 2009. godini, čime su prekršene odredbe člana 11. stav (1) Zakona o finansiranju političkih stranaka.

5.2. PREPORUKE

Preporučuje se Hrvatskoj stranci prava Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da postupa u skladu sa odredbama člana 4. stav (2), člana 8. stav (1) i člana 11. stav (1) i (3) Zakona o finansiranju političkih stranaka i to:*
 - *da za nabavljene proizvode ili usluge pribavlja odgovarajuću dokumentaciju,*
 - *da se ne finansira zabranjenim priložima,*
 - *da vodi evidencije o svojim prihodima i rashodima i*
 - *da finansijske izvještaje koje podnosi Centralnoj izbornoj komisiji BiH sačinjava u formi propisanoj Pravilnikom o godišnjim finansijskim izvještajima političkih stranaka.*

KOMENTAR:

U ostavljenom roku, Hrvatska stranka prava Bosne i Hercegovine nije dala primjedbe na nalaze koji su dati u Preliminarnom izvještaju o reviziji godišnjeg finansijskog izvještaja za 2009. godinu.

Zahvaljujemo se osoblju Hrvatske stranke prava Bosne i Hercegovine na dobroj i korektnoj saradnji tokom obavljanja revizije finansijskih izvještaja.

Mr. Hasida Gušić, šef Službe za reviziju

Veliborka Kravljača, revizor

Anela Burdžović - Kapić, pomoćnik revizora